

孟縣志卷五

命戶部主事馮敏昌撰 孟縣知縣仇汝瑚全起

人物第六上

唐王行謂天下山河之象存乎兩戒大河自北紀之首至太行之曲與濟瀆相表裏當雲漢之中故河濟之間爲川文之國而賈疏周禮亦謂河內至鄴得河山之會夫太行黃河天下大觀奔廻相湊如此其壯而人物不稱焉殆未之有也是故聞主韓公靈同嶽降泰山北斗千古爲昭迨於我

朝旣仍宋時封爵暨從祀

文廟之典至乾隆四年更蒙

聖恩特賜世職與聖賢後裔同垂勿替千年舊澤一旦重
光斯固天佑斯文抑亦地廻元氣矣然亦不特此其
先後乎韓公者文章事業英風偉節如張李馮郝之
流皆足深人仰止之思茲具載正史本傳間附考訂
於後其正史未載見於他書及舊志者亦採錄載入
至徵辟科貢職監以及孝義文學列女則顯揚登進
潛德幽光均堪備載爰以類相次而方技仙釋亦附
見於後庶幾磊落英多與名山大川互爲增色矣是
爲志第六

後漢書張元列傳

張元字君夏河內河陽人也少習顏氏春秋兼通數家

法建武初舉明經補宏農文學遷陳倉縣丞清淨無欲
專心經書方其講問迺不食終日及有難者輒爲張數
家之說令擇從所安諸儒皆伏其多通著錄千餘卷元
初爲縣丞嘗以職事對府不知官曹處吏白門下責之
時右扶風琅邪徐業亦大儒也聞元諸生試引見之與
語大驚曰今日相遭眞解矇矣遂請上堂難問極日後
元去官舉孝廉除爲郎會顏氏博士缺元試策第一拜
爲博士居數月諸生上言元兼說嚴氏宣氏不宜專爲
顏氏博士光武且令還署未及遷而卒

魏書張安祖傳

張安祖河陽人也襲世爵山北侯時有元承貴曾爲河

陽令家貧且赴尚書求選逢天寒甚遂凍死路側一子
年幼停屍門巷棺殮無託安祖悲哭盡禮買木爲棺手
自營作殮殯周給朝野嘉歎尚書聞奏標其門閭

周書段永列傳

段永字永賓其先遼西石城人晉幽州刺史匹磾之後
也曾祖悞仕魏黃龍鎮將因徙高陸之河陽焉永幼有
志操閭里稱之魏正光末六鎮擾亂遂攜老幼避地中
山後赴洛陽拜殿中將軍稍遷平東將軍封沃陽縣伯
邑五百戶青州人崔社客舉兵反永討平之進爵爲侯
除左光祿大夫時有賊魁元伯生率數百騎西自嶧潼
東至鞏洛屠陷塢壁所在爲患魏孝武遣京畿大都督

匹婁昭討之昭請以五千人行永進曰此賊旣無城柵
唯以寇抄爲資安則蟻聚窮則鳥散取之在速不在衆
也若星馳電發出其不虞精騎五百自足平殄若徵兵
而後往彼必遠竄雖有大衆無所用之帝然其計於是
命永代昭以五百騎討之永覘知其所在倍道兼進遂
破平之帝西遷永時不及從大統初乃結宗人潛謀歸
款密與都督趙業等襲斬西中郎將慕容顯和傳首京
師以功別封昌平縣子邑三百戶除北徐州刺史從擒
竇泰復宏農破沙苑並有戰功進爵爲公河橋之役永
力戰先登授南汾州刺史累遷大都督車騎大將軍儀
同三司散騎常侍驃騎大將軍開府儀同三司賜姓爾

繇氏魏廢帝元年授恒州刺史於時朝貴多其部人謁
永之日冠蓋盈路當時榮之孝閔帝踐祚進爵廣城郡
公轉文州刺史入爲工部中大夫遷軍司馬保定四年
拜大將軍永歷任內外所在頗有聲稱輕財好士朝野
以此重焉前後累增凡三千九百戶天和四年授小司
寇尋爲右二軍總管率兵北道講武遇疾卒於賀葛城
年六十八喪還高祖親臨贈使持節柱國大將軍同華
等五州刺史諡曰基子岌嗣官至儀同三司兵部下大
夫

唐書張建封列傳

子愔附

張建封字本立鄧州南陽人客隱兗州父玠少任俠安

祿山反使李廷偉脅徇山東魯郡太守韓擇木迎館之
玠率豪桀段絳等集兵將斬以徇擇木不許唯司兵參
軍張孚助其謀乃殺廷偉并其黨以聞擇木孚皆受賞
而玠去之江南不自言功建封少喜文章能辯論慷慨
尙氣自許以功名顯李光弼鎮河南盜起蘇常間殘掠
鄉縣代宗詔中人馬日新與光弼麾下皆討建封見中
人請前喻賊可不須戰因到賊屯開譬禍福一口降數
千人縱還田里由是知名湖南觀察使韋之晉辟署參
謀授左清道兵曹參軍不樂職輒去令狐彰節度滑毫
奏置幕府彰不朝覲建封非之往見轉運使劉晏晏奏
試大理評事使筦漕務歲餘罷時馬燧爲三城鎮遏使

雅知之表爲判官擢監察御史燧伐李靈耀軍中事多
所諏訪從鎮河東授侍御史卽表其能於朝楊炎將任
以要職盧杞不喜出爲岳州刺史李希烈旣破梁崇義
跋扈不臣壽州刺史崔昭與相聞德宗召宰相選代昭
者杞倉卒不暇取它吏卽白用建封希烈數敗王師張
甚遂僭卽天子位淮南節度使陳少游陰附之希烈遣
將楊豐齎僞赦二畀建封少游豐至建封縛致軍中會
中人來對之斬其首因送僞書於行在少游聞之恚汗
不自處建封乃劾其附賊狀帝方蒙難不暇治也希烈
又署杜少誠爲淮南節度使約破壽州以趣江都建封
壁霍邱秋柵拒之賊不能東遷圍練使帝還自梁少游

卒憂死進兼御史大夫濠壽廬觀察使是時四方尙多
故乃繕陴隍益治兵四鄙附悅希烈使驃帥悍卒來戰
建封皆沮劬之賊平進封階又任一子正貞官貞元四
年拜御史大夫徐泗濠節度使始李洧以徐降洧卒高
承宗獨孤華代之地迫於寇常困縻不支於是李泌建
言東南漕自淮達諸汴徐之埭橋爲江淮計口今徐州
刺史高明應甚少脫爲李納所并以梗餉路是失江淮
也請以建封代之益與濠泗二州夫徐地重而兵勁若
帥又賢卽淄青震矣帝曰善繇是徐復爲雄鎮久之檢
校尙書右僕射十三年來朝帝不待日召見延英殿詔
會朝赴大夫班以示殊寵建封賦朝天行以獻帝眷遇

異等賜名馬珍具是時宦者主宮市置數十百人閱物
塵左謂之白望無詔文驗覈但稱宮市則莫敢誰何大
率與直十不償一又邀閤闥所奉及腳傭至有重荷趨
肆而徒返者有農賣一驢薪宦人以數尺帛易之又取
它費且驅驢入宮而農納薪辭帛欲亟去不許恚曰惟
有死耳遂擊宦者有司執之以聞帝黜宦人賜農帛十
匹然宮市不廢也諫臣交章列上皆不納故建封請間
爲帝言之帝頗順聽會詔書蠲民逋賦帝問何如答曰
殘逋積負決無可斂雖蠲除之百姓尙無所益又陳河
東節度使李說華州刺史盧徵皆病不能事左右得以
爲姦右金吾大將軍李翰好刺細事規寵人疾惡之帝

悉嘉可未幾制詔官師過從人情之常自今金吾勿以
聞上已賜宴曲江特詔與宰相同榻食其還鎮帝賦詩
以餞於時雖馬燧渾瑊劉元佐李抱真等勲寵卓越未
有以詩餞者帝又使左右以所持鞭賜之曰卿節誼歲
寒弗渝故用此爲況建封又賦詩以自警勵十六年以
病求代詔韋夏卿代之未至而建封卒年六十六冊贈
司徒治徐凡十年躬於所事一軍大治善容人過至健
黠亦未嘗曲法假之其言忠義感激故下皆畏悅性樂
士賢不肖游其門者禮必均故其往如歸許孟容韓愈
皆奏署幕府有文章傳於時子愔始以蔭補虢州參軍
事建封卒府佐鄭通誠者攝留事畏其軍亂因浙西戍

兵過徐謀引以爲援舉軍怒斧庫取兵環府大譟殺通誠及大將數人乃表於朝請愔爲留後假旄節帝不許披濠泗隸淮南詔杜佑討徐亂泗州刺史張仝以兵攻埧橋與徐軍戰仝大敗帝未有以制乃授愔右驍衛將軍徐州刺史知留後以仝爲泗州留後杜兼爲濠州留後俄進愔武寧軍節度使元和初以疾求代召爲工部尙書以王紹節度武寧還濠泗隸徐徐人喜遂不敢亂而愔得行未踰境卒愔治徐七年其政稱治贈尙書右僕射

附錄舊唐書張建封列傳

張建封字本立兗州人祖仁範洪州南昌縣令貞元

初贈鄭州刺史父玠少豪俠輕財重士安祿山反令
僞將李庭偉率蕃兵脅下城邑至魯郡太守韓擇木
具禮郊迎置於郵館玠率鄉豪張貴孫邑段絳等集
兵將殺之擇木怯懦大懼唯員外司兵張孚然其計
遂殺庭偉并其黨數十人擇木方遣使奏聞擇木張
孚俱受官賞玠因遊蕩江南不言其功以建封貴贈
秘書監建封少頗屬文好談論慷慨負氣以功名爲
已任寶應中李光弼鎮河南時蘇常等州草賊寇掠
郡邑代宗遣中使馬日新與光弼將兵馬同征討之
建封乃見日新自請說喻賊徒日新從之遂入虎窟
蒸里等賊營以利害禍福喻之一夕賊黨數千人並

詣日新請降遂悉放歸田里大歷初道州刺史裴虬
薦建封於觀察使韋之晉辟爲叅謀奏授左清道兵
曹不樂吏役而去滑亳節度使令狐彰聞其名辟之
彰旣未曾朝覲建封心不悅之遂投刺於轉運使劉
晏自述其志不願仕於彰也晏奏試大理評事勾當
軍務歲餘復罷歸建封素與馬燧友善大歷十年燧
爲河陽三城鎮遏使辟爲判官奏授監察御史賜緋
魚袋李靈曜反於梁宋間與田悅犄角同爲叛逆燧
與李忠臣同討平之軍務多咨於建封及燧爲河東
節度使復奏建封爲判官特拜侍御史建中初燧薦
之於朝楊炎將用爲度支郎中盧杞惡之出爲岳州

刺史時淮西節度使李希烈乘破滅梁崇義之勢漸縱恣跋扈壽州刺史崔昭數書疏往來淮南節度使陳少遊奏之上遽召宰相令選壽州刺史盧杞本惡建封是日蒼黃遂薦建封以代崔昭牧壽陽李希烈稱兵寇陷汝州擒李元平擊走胡德信唐漢臣等又摧破哥舒曜於襄城連陷鄭汴等州李勉棄城而遁涇師內逆駕幸奉天賊鋒益盛淮南陳少遊潛通希烈尋稱僞號改元遣將楊豐賁僞赦書二道令送少遊及建封至壽陽建封縛楊豐徇於軍中適會中使自行在及使江南迴者同至建封集衆對中使斬豐於通衢封僞赦書送行在遠近震駭陳少遊聞之旣

五
怒且懼建封乃具奏少遊與希烈往來事狀希烈又
僞署其黨杜少誠爲淮南節度使令先平壽州趣江
都建封令其將賀蘭元均邵怡等守霍邱秋柵少誠
竟不能侵軼乃南掠蘄黃等州又爲伊慎所挫衄尋
加建封兼御史中丞本州團練使車駕還京陳少遊
憂憤而卒興元元年十二月乃加兼御史大夫充濠壽
廬三州都團練觀察使於是大修緝城池悉心綏撫遠
近悅附自是威望益重李希烈選兇黨精悍者率勁
卒以攻建封曠日持久無所尅獲而去及希烈平進
階封賜一子正員官初建中年李涓以徐州歸附涓
尋卒其後高承宗父子獨孤華相繼爲刺史爲賊侵

削貧困不能自存又咽喉要地據江淮運路朝廷思
擇重臣以鎮者久之貞元四年以建封爲徐州刺史
兼御史大夫徐泗濠節度支度營田觀察使旣創置
軍伍建封觸事躬親性寬厚容納人過誤而按據綱
紀不妄曲法貸人每言事忠義感激人皆畏悅七年
進位檢校禮部尙書十二年加檢校右僕射十三年
冬入覲京師德宗禮遇加等特以雙日開延英召對
又令朝叅入大夫班以示殊寵建封賦朝天行一章
上獻賜名馬珍玩頗厚時宦者主宮中市買謂之宮
市抑買人物稍不如本估末年不復行文書置白望
數十百人於兩市及要鬧坊曲閱人所賣物但稱宮